



UKA 2013/30
15. oktober 2013
HA

Peqqissaasut Palliativ-imik nakorsaasinnaanermut ilinniaqqissinnaanerit anguniarlugu immikkut aningaasaliisoqarnissaanik Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Doris Jokobsen, Siumut)

Ilinniartitaanermi paasisat nutaat takkussuuttuartillugit ilinniartitaanerit pisariaqartinneqartut amerliartuinnartussaasut Inuit Ataqtigiinni isumaqartuaannarpugut.

Ukiunilu makkunani ilinniakkatigut pisariaqartinneqartut pillugit annertusaanerit ingerlalluarput, piffissarlu ilinniartitaanikkut ineriartornermut atugarput aammalu suliniutigineqartunut ullumikkut naammassineqarsimaneri apeqqutaatillugit suliaqartariaqartugut Inuit Ataqtigiinni isumaqarpugut.

Ilinniartitaanermut tunngatillu Naalackersuisup akissummini eqqartugaai tamakkiisumik Inuit Ataqtigiinniit tapersersorlugit oqaatigissavarput. Tassani ilinniaqqinnissamut tunngatillugu pisariaqartitat naapertorlugit ilinniaqqittoqarsinnaanera, soorlu anniatsaaliinermut tunngatillugu ilinniaqqittarnissat pikkorissartarnissallu pingaartut aamma isigaavut.

Naalackersuisup akissutaanni aamma takuneqarsinnaavoq, Peqqinnissaqarfimmi Ilinniarnernut Qitiusumik Ilinniarfimmi kiisalu Peqqissaanermut Peqqissutsimullu Ilisimatusarnermut Ilisimatusarfiup immikkoortortaqarfiani sulisunit qinnuteqarfigineqarsinnaasumik. Anniaatinik ippinnarunnaarsaaneq atorlugu napparsimasunik paaqutaqarnermut tagiartuillunilu peqqissaanermut pikkorissartitsinissamik Peqqissaanermik Ilinniarfimiit neqeroorutaasumik pilersitsisoqarnikuusoq, pikkorissarnerillu peqqinnissaqarfinni, utoqqaat illuini assigisaannilu sulisut tamarmik suliat akimorlugit neqeroorutaasuttaaq ilisimatsissutigineqarluni.

Akissummi aamma ersarippoq 2012-imilu ukiakkut Peqqissutsimut Naalackersuisoqarfimmi Hospice-mik pisariaqartitsisoqarnera pillugu siunnersuummut atasumik anniaatinut ippinnarunnaarsaaneqartumut tunngasunut tassanilu suliniuteqarnissaq pillugit misissueqqissaanermik aallartitsisoqareersimasoq, tamannalu Inuit Ataqtigiinni qujarupparput taasinnaalerlugulu suliaq aallartinneqareersimasoq. Ilanngullugulu soqtiginnittunut nunani allani pineqartortaaq ilinniarneqarsinnaasoq.

Taamatut oqaseqarluta Inuit Ataqtigiinniit naalackersuisut suliamik itigartitsissutaat paasilluarlugu taperserparput.